

# INUIT ATAQATIGIIT

## Inatsisartuni



04. november 2020

Inatsisartut Suleriaasianni § 37 imm. 1 naapertorlugu Naalackersuisunut apeqquut imaattoq matumuuna saqqummiuppara.

### Naalackersuisunut apeqquut:

1. Pilattaasarnermi immikkoortumi pisortanik nutaanik atorfinitsinerup kingorna ukiup ataatsip iluani sooq pilattaanermut immikkoortumi K2-mi sygeplejerskit tamarmik, afdelingssygeplejersit marluk, afdelingsjordemoderi ataaseq kiisalu nakorsarpassuit, tassani Kalaallit Nunaanni nakorsat pilattaasartut misilittagaqarnerpaat ilanngullugit, soraarniuteqarsimanersut Naalackersuisut nassuiarsinnaavaat?
2. Sulinermut avatangiisit ukiup kingulliup ingerlanerani ima ajortigilersimanerat, allaat nakorsat – ingammillu kalaallit nakorsat – suliffimmini iluarusukkunnaarsimallutik taamaalillutillu pilattaasarnermut immikkoortumi sulinissaq kissaatigiunnaarsimagaat, Naalackersuisut uppersarsinnaavaat?
3. Ineriartorneq tamanna ingammik kalaallinik sygeplejerskinik nakorsanillu atorfeqaannartitsiniarnermut atorfinitsiniarnermullu anguniakkamut qanoq naapertuuppa?
4. Naalackersuisut sammisamut uunga allanik paasissutissaateqarpat?

(Inatsisartunut ilaasortaq Stine Egede, Inuit Ataqatigiit)

### Tungavilersuut:

Immikkoortortaqaqarfinni K2-mi sulisoqarnikkut unammilligassaartoq paasisimavara, taamaattumillu apeqquutigisariaqarlugit, nalunnginnakku Peqqinnissamut Naalackersuisoq sulinermi avatangiiserissaarnissap pingaaruteqarneranik oqariartorsimanagera ilisimagakku. Taamaattoq immikkoortortani pineqartuni ineriartorneq annertuumik aarleqquteqarnera pissutigalugu apeqquutit siuliani taasakka saqqummiuttariaqalersimavakka.

Pilattaasarnermut immikkoortoq sulisoqarnermigut ingerlalluanngippat, pilattaanissat kinguartinneqarsinnaanerata, taamaalillunilu utaqquisut amerliartulernissaat aarlerinarpoq.

Aamma eqimattat taakku suliffimminnik iluarisimaarinninnissaat tamatta akisussaaffigaarput. Aatsaat taamaaliornikkut taakku piffissami sivisuumi suliffimminniiginnarlutik, kunneqarfitta ilaanut allamut aallannginnissaat qularnaarsinnaavarput.

Ullut suliffiusut qulit ingerlaneranni akissutisereernissara qinnutigaara.